

**Naalakkersuisut Inatsisartullu qanoq ICC-p 2014-imi
 ataatsimeersuarneraniinaarutaasumik nalunaarusiaani Kitigaaryunni Nalunaarummi
 anguniagassatutallattorsimasut anguneqarsinnaanissaannut qanoq
 suleqataasinnaanersut kiisaluissittumi inatsisartut naalakkersuisullu allat
 suleqatigalugit issittumiluannerusumik suleqatigiilernissaq pillugu oqallisissiatut
 siunnersuut**

(Inatsisartunut ilaasortat Sara Olsvig aamma Mimi Karlsen, Inuit Ataqatigiit)

Akissuteqaat

(Inuussutissarsiornermut, Sulifeqarnermut, Niuernermut Nunanullu Allanut Naalakkersuisoq)

Aallarniutigalugu apeqquteqaat aallaavigalugu oqallinnissamik siunnersuummut saqqummiunneqartumut qujavunga.

ICC-p kingullermik ataatsimeersuarnerani inaarutaasumik nalunaarusiaani Kitigaaryunni Atsioqatigiinnermi anguniagassatut allattorsimasut anguneqarsinnaanissaannut Naalakkersuisut Inatsisartullu qanoq suleqataasinnaanersut aammalu anguniagassat naammassineqarnissaat pillugu issittumi inatsisartunik naalakkersuisunillu allanik qanoq suleqateqarsinnaanersut pillugu Inatsisartunut ilaasortat Sara Olsvig aamma Mimi Karlsen apeqquteqaat aallaavigalugu oqallinnissamik siunnersuiteqarput. Siunnersuiteqartut taamatuttaaq ataatsimut isigalugu Issittumi suleqatigiinnerulerlernissamut apeqquteqarput.

Issittumi nunat sanilitta suleqatiginissaat aammalu issittumi nunap immikkoortuani equeersimaartumik suleqataanissaq Naalakkersuisut pingaartittorujussuaat, pissutigalugu unammilligassarpasuit periarfissarpasuuillu ataatsimoorfigisaratsigu.

Kitigaaryunni Atsioqatigiinnermi anguniagassani arlalinni, nunami namminermi aammalu nunani tamalaani assigiinngitsunut atatillugu qulequttat Naalakkersuisut tungaannit annertoorujussuarmik equmaffigineqareersut sammineqarput, tassanilu ilaavoq issittumi suleqatigiinnerit.

Suliniutinut Kitigaaryunni Atsioqatigiinnermi anguniakkatut malinnaaffiginiarneqartunut aalajangersimasumik assersuutit makkua erseqqissarneqarsinnaapput:

Issittumi Siunnersuisooqatigiit aamma Nunani tamalaani naapittarfiiit

Kitigaaryunni Atsioqatigiinnermi anguniakkani pingaartumik qulequttat issittumi nunap immikkoortuanut tassanilu innuttaasunut pingaaruteqartut sammineqarput, tamannalu pissutigalugu Nalunaarummi anguniakkat arlallit aamma Issittumi Siunnersuisooqatigiinni Naalakkersuisut equeersimaartumik peqataaffigisaanni, sammineqarput.

Naalakkersuisut ilaatigut FN-imi nunap inoqqaavisa pisinnaatitaaffiinut tunngatillugu peqataapput. Tassani Naalakkersuisut Kalaallit Nunaata soqutigisaasa naammassineqarnissaat sulissutigaat aammalu issittumi nunap immikkoortuanut sapinngisamik pitsaanerpaamik angusaqarnissamut, Issittumi nunap inoqqaavi suleqatigalugit.

Avatangiisit

Uumassusillit assigiinngisitaarnerisa qulakkeerneqarnissaanik suliaqarnermi Naalakkersuisut equeersimaartumik peqataapput, tassani ilaavoq Uumassusillit assigiinngisitaarnerannut tunngatillugu nunani tamalaani isumaqatigiissummi aamma uumasut nungutaaqqajaasut pillugit CITES-imi nunani tamalaani isumaqatigiissummi peqataaneq.

Isumaqatigiissutit uumassusillit nuuttarnerinut tunngatillugu aqtsinermut tunngasut arlallit Naalakkersuisut atsiorsimavaat, ilaagitug Canadap aalisarnermut ministereqarfianut isumaqatigiissut qilalukkat qernertat aamma qilalukkat qaortat piujuartinnissaannut aammalu aqtsivigineqarnisaannut tunngasoq.

Akuutissat mingutsitsisartut aamma gassit silaannarmut akuliuttartut annikillisinneqarnissaat kiisalu issittumi immani avatangiisink illersuinissaq pillugit Issittumi Siunnersuisooqatigiinni suliniuteqarnermut Naalakkersuisut peqataasimapput. Taamatuttaaq nunap inoqqaavisa akornanni minguitsumik imermik imigassaqarnissaq qulakkeerniarlugu Naalakkersuisut ataavartumik sulipput.

Umiarsuit angallannerat aamma aalisarneq

Immani pisinnaatitaaffit pillugit nunani tamalaani isumaqatigiissutip aamma Nunani tamalaani imarsiornermut kattuffiup ataanni suliaqarnermut atatillugu Kalaallit Nunaata pisinnatitaaffisa aamma soqutigisaasa qulakkeernissaat Naalakkersuisut sulissutigaat.

Pingaaruteqarpoq Tunup avannaatigut Qalasersuup eqqaatigoorluni angallassineq aallartinneqalerpat piniarfiit piaqqiorfiillu erseqqissarneqassasut taavalu illersorneqassasut. Umiartortut avatangiiseq, pinngortitami pissuseqatigiinneq taavalu aalisartut piniartullu pisariaqartitaat qajassuussavaat, aamma siunissami pinngortitami pisuussutit piujuarnissaat taavalu nungukkiartuaanngitsumik atuinissaq isumannaajarnejarniassammat.

Peqqinnissaq aamma inulluataarneq

Issittumi nunap immikkoortuani suliaqarnermut atatillugu inuit eqqarsaatigineqartarnissaasa qulakkeerneqarnissa Naalakkersuisut ataavartumik sulissutigaat, ilanngullugu Issittumi nunap inoqqaavisa akornanni eqqarsartaatsikkut inulluataarnermut aamma kræfteqalertarnermut tunngatillugu Issittumi Siunnersuisooqatigiit suliniuteqarnerannut Naalakkersuisut peqataasimapput.

Nerisassat isumannaallisaaneq

Ileqquusut malillugit nerisassanik pissarsisinnaanerup pingaaruteqassusaa Naalakkersuisut aalluppaat, ilanngullugu Nunani tamalaani Arfanniartarneq pillugu ataatsimiititaliarsuarmi peqataanermi.

Ilinniartitaaneq aamma oqaatsit

Nunanut issittumiittunut arlalinnut isumaqatigiissutinik Naalakkersuisut atsiugaqarsimapput, ilanngullugu Nunavut, tassani ilinniartitaaneq suliassaqarfittut suleqatigiinnerup annertunerulerfigisinnaasaatut erseqqissarneqarluni.

Ileqquusunik ilisimasaqarneq aamma ilisimatusarneq

Suliaqarnermi ileqquusunik ilisimasaqarnerup ilanngutsinneqartarnissa Naalakkersuisut naapittarfinni assigiinngitsuni sulissutigaat, ilanngullugu ileqquusunik ilisimasaqarnermut Issittumi Siunnersuisooqatigiinni suliaqarnermi Naalakkersuisut equeersimaartumik peqataapput.

Matuma siuliani taaneqartut tamakkiisumik allattugaanngillat, kisianni Kitigaaryunni Atsioqatigiinnermi tunngatillugu Naalakkersuisut suliniuteqareernerinut assersutissaannaallutik.

Taamatut oqaaseqarlunga oqaaseqartussap tullianut oqaaseqarnissaq tunniuppara aammalu
Inatsisartuni pilersitsiviulluartumik oqallinnissaq neriuutigalugu.